

共同經課-1 出埃及記二十章一節～十七節

1 上帝吩咐諸個一切的話講：2 「我是耶和華——你的上帝，曾導你對埃及地，對做奴才的家出來的。3 「我以外你毋通有別個上帝。4 「毋通為著家已雕刻偶像，不論天頂、地上，及地下、水內所有的物攏毋通做 in 的像。5 毋通敬拜 in，也毋通服事 in，因為我耶和華——你的上帝，斷斷毋容允用別個上帝匹配我。怨恨我者，我歸咎伊的罪，對父到子，到三四代；6 疼我、守我誠命者，我施恩互伊，直到千代。7 「毋通濫糝稱耶和華——你的上帝的名；因為濫糝稱伊的名的人，耶和華的確無掠伊做無罪。8 「著記得安息日，守伊做聖。9 六日內應該著磨做你一切的工，10 獨獨第七日就是向耶和華——你的上帝來守的安息。此日你及你的子、查某子、奴僕、奴婢、精牲，以及踮佇你中間的出外人，一切的工攏毋通做；11 因為六日內，耶和華創造天、地、海，及彼中間萬物，第七日就息，所以耶和華賜福佇安息日，設立伊做聖。12 「著孝敬你的老父你的老母，互你的日子佇耶和華——你的上帝所賞賜你的地得著久長。13 「毋通害死人。14 「毋通行姦淫。15 「毋通偷提。16 「毋通做假的干證陷害你的厝邊。17 「毋通貪你的厝邊的厝；也毋通貪你的厝邊的某、奴僕、奴婢、牛、驢，以及你的厝邊一切所有的。」

共同經課-2 詩篇十九篇

1 [大衛的詩，交互樂官。] 諸個天講起上帝的榮光；穹蒼報揚伊的手所做的。2 此日對彼日發出言語；此暝對彼暝傳出知識。3 無言無語，in 的聲無通聽見。4 in 的準繩遍佇天下，in 的言語到佇地極。上帝佇 in 中間為著日頭安置帳房；5 日頭親像新子婿出伊的房，亦親像猛勇的人歡喜走伊的路。6 伊對天的此旁出，覓到天的彼旁，無一項物園密，無得著伊的熱氣。7 耶和華的律法齊全，會互人的心神活起來；耶和華的干證確實，會互人有智慧。8 耶和華的教示正直，會互人的心歡喜；耶和華的命令清潔，會互人的目矚光明。9 敬畏耶和華的道理是清氣，永遠存在；耶和華的判斷真實，一概是公義 10 ——比金，比多多好金卡通欣慕；比蜜，比蜂房滴落來的蜜卡甜。11 閣你的奴僕對諸個受警戒，守諸個有大賞賜。12 是誰會知伊的失錯啊？求你除去我暗靜的過失。13 求你阻止你的奴僕無故意犯罪，毋准彼個罪惡管轄我，我就完全，免犯大罪。14 耶和華——我的石磐，救贖我的主啊，願我的嘴所講的、心所想的佇你的面前得著接納。

共同經課-3 哥林多前書一章十八節～二十五節

18 因為十字架的道理，沈淪的人看做蠢；咱得救的人，看做上帝的權能。19 因為有記載講：我欲滅無智慧的人的智慧，也欲棄揀聰明的人的聰明。20 智慧的人佇叨落？經學士佇叨落？此世間好辯論的人佇叨落？上帝豈毋是互世間的智慧變成蠢？21 因為世間既然對 in 的智慧，毋識上帝，上帝就歡喜對所宣傳的蠢來救諸個信的人，這攏是上帝的智慧。22 因為猶太人求神蹟，希利尼人尋智慧，23 若是阮傳釘十字架的基督，對佇猶太人是塞礙，對佇外邦人是愚蠢；24 若是對佇受召的，無論猶太、希利尼，基督做上帝的權能，上帝的智慧。25 因為上帝的愚蠢比人卡智慧，上帝的軟弱比人卡勇壯。

共同經課-4 約翰福音二章十三節～二十二節

13 猶太人的搬(pòaⁿ)過節近啦，耶穌上耶路撒冷。14 佇殿裡抵著有賣牛、羊、鴿仔，亦有換錢的啲坐，15 耶穌用索做鞭，趕 in 及羊牛攏出殿，閣掉倒換錢的人的錢，反輪轉 in 的桌，16 閣給賣鴿仔的講：「帶諸個物去！毋通用我的父的厝做買賣的厝。」17 伊的學生記得聖經有記講：「我為著你的厝，心內親像火芒。」18 猶太人就應伊講：「你做諸個代誌，用甚麼神蹟互阮看？」19 耶穌應講：「恁毀壞此個殿，我三日欲閣起伊。」20 猶太人就講：「此個殿歷過四十六年才起好，亦你三日欲閣起伊嗎？」21 若是伊按呢講是啲論伊的身軀的殿。22 到伊對死人中復活，伊的學生才記得伊曾按呢講，就信聖經及耶穌所講的話。